

Ri ruca'n carta ri xutz'ibaj can ri apóstol San Juan

Ri Juan nutz'om tzij

¹Yin Juan, ri uc'uey quichin ri hermanos, nintz'ibaj c'a e ri carta re' chave rat hermana ri rat cha'on roma ri Dios. Nintük c'a e saludos cheque ri aval. Ketzij nyixinjo'. Y man xe tuj yin ri nyixinjo', xa nyixquijo' chuka' conojel ri ch'aka chic ri quetaman chic ri ketzij. ²Y roma c'o ri ketzij pa tak kánima, romari' nkajola-ki'. Y ri ketzij nc'uje' c'a kiquin richin chi jumul. ³Y ri utzilij sipanic ri nspaj-pe ri Dios, ri joyovanic y ri uxlanen ri petenük chila' riq'uin ri Katata' Dios y riq'uin chuka' ri Ajaf Jesucristo ri Ruc'ajol ri Katata' Dios, jari' ri nc'uje' pa tak ivánima. Xtic'ul-vi c'a ronojel re', roma iyo'on ivánima riq'uin ri ketzij y roma chuka' ri nyixjo'on.

⁴Yin juis quicot xuya' pa vánima tok xenvil que ri ch'aka cheque ri aval quitzekleben ri ketzij, cachi'el nbij ri Katata' Dios cheke chupan ri rutzij. ⁵Y vocomi hermana, ninchilabej c'a chave que tabana' ri nbij ri Dios, que tikajola-ki'. Y ri tzij re' man c'ac'a' tuj. Xa jare' ri chilaben-pe cheke tok xkatekej ri Dios. ⁶Y si ja ri nyerubij ri Dios ri nyekabün, nkajola-ki'. Roma rija' nbij que tikajola-ki'. Y rix ivetaman que quiri' nbij, roma xivac'axaj yan pe tok xitakej ri Dios.

Yec'o-vi ch'aconela'

⁷Ye q'uiy c'a ch'aconela' nyebiyaj chuvüch ri ruch'udef ri nyebin que ri Jesucristo tok xpu'u chere' chuvüch ri ruch'udef man xoc tuj cachi'el roj vinük. Y ri nbij quiri' chirij ri Jesucristo, jari' ri ch'aconel ri netzelan richin ri Cristo y nbün que ja rija' ri Cristo. ⁸Jac'a rix ri jabel isamajin-pe ri Dios, tichajij c'a ri ic'aslen, richin quiri' man tizatc c'a ri sipanic ri nuya' ri Dios roma ri isamaj. Tz'aküt ta tok nie'ul.

⁹Yec'o vinük ri nquibij que c'o más etamabül quiquin pari' ri tijonic richin ri Cristo, y xa man quiri' tuj. Roma rije' xa pa ruq'uexel nyejel-apu riq'uin ri Cristo, xa nye'el-e riq'uin. Ri nyebin c'a quiri', manak c'a ri Dios

quiq'uin. Jac'a roj ri man nkaya' tuj can ri tijonic ri richin ri Cristo, c'o ri Katata' Dios y ri Ruc'ajol kiq'uin. ¹⁰Si c'o jun napon chi'ivacho y man ja tuj ri tijonic richin ri Cristo ri ruc'uan-apu chive, man c'a tie'ul ni man tibij chuka' e chin: Ri Dios xtito'on ta avichin, man tibij chin. ¹¹Roma si nic'ul y nirayij ronojel utz pari', nivakalej chuka' rix ri itzel ri nbanala' ri jun ri'.

Ri ruq'uisbül tak tzij

¹²Y c'o q'uiy ri ninjo' ninbij chive. Pero man ninjo' tuj nintz'ibaj más chupan ri carta re'. Roma ninrayij nquinapon na iviq'uin richin jari' ninbij chive, richin quiri' ri kánima nquina' ta quicot.

¹³Ri ye ral ri a-hermana nquitük-e saludos chave. Ri a-hermana re' cha'on-vi roma ri Dios. Quiri' vi.